
N UC BRUNET ou BRUNENC.

2701, 7225, 7614, 7698.

UC BRUNET si fo de la ciutat de Rodes, qu'es de la seignoria del Comte de Tolosa, e fo clergues; e apres be letras e saup ben trobar. Subtils era mot e de gran sen natural; e fes se joglars e fes motas de bonas cansos, mas non fetz sons. Et anet ab lo rei'n Alfons d'Arago, et ab lo comte de Tolosa, e ab lo comte de Rodes lo sieu seignor, et ab eu Bernart d'Anduza, et ab lo Dalfi d'Alverne. Et entendet en una borzeza d'Orlhac, que avia nom madona Galiana; mas ela non lo volc amar ni retener, ni far negun plazer endreg d'amor; e tan qu'ela avia fag son drut del comte de Rodes, e donet comiat a 'n Uc Brunenc. Et adonc a Uc, per la dolor que el n'ac, mas se en l'ordre de Cartosa; et aqui el morí.

CUENDAS razos e novelas plazens
Contem hoi mais et aiam bel solatz ;
E partam nos d'enois e de foldatz ,
Et aprendam cortezias e sens :
Quar la foldatz ten dan mantas sazoz ,
E sen cortes es gaug onratz e bos.

Ab los joios deu hom esser jauzens ,
E gen parlar ab los enrazonatz ;
Quar aitan so de bos motz , si'ls cercatz ,
Com de vilas e de desavinens :
E gen parlars ab avinens respos
Adutz amics e no creis messios.

Mas d'una res soi en greu pessamens ;
Don viura joi si cantar l'es emblatz ?
Ni co sera cors ben amans triatz ,
Si ja non es ni jogans ni rizens ?
Per cest o dic embroncatz cossiros ,
Que à las vetz se fenhon Salamos.

E qui cujatz queus sia defendens ,
Si avols es , qu'om nous apel malvatz ?
Que temps avetz e poder vos es datz ,
E noi vezetz mentre'l lum es ardens.
Gardatz vos i que'l temps es tenebros
E noi veiretz quan lo lum er rescos.

Quar un perilh cor sobre totas gens ,
Mortz , que desfai los comtes e'ls prelatz ;
Per que val mais si fatz que si pensatz ,
Qu'en pauc de temps i ven alongamens :
Pero lo fatz es avinens e bos
Que no s'i paus malvada ocaizos.

HUGUES BRUNET.

CORTEZAMEN mov en mon cor mesclansa
Que m fai tornar en l' amoros dezire ;
Joya m promet et aporta m cossire ,
Quar en aissi sap ferir de sa lansa
Amors , que es us esperitz cortes ,
Que no s deixa vezer mas per semblans ,
Quar d' huelh en huelh salh e fai sos dous lans ,
E d' huelh en cor e de coratge en pes.

En aissi vens e destrenh e sobransa
Selhs qu' a sos ops vol triar et eslire ,
Mas aissi a un perilhos martire
Que sa dolors vol que si' alegransa ,
E dels sieus tortz que il refeir' hom merces ,
E contr' orguelh qu' om si' humilians ;
Qu' amor no vens menassa ni bobans
Mas gens s'ervirs e precx e bona fes.

Mas a mi fai sobre totz un' onransa ,
Qu' anc mon dezir no volc en dos devire ,
Ans , quan se ven en mon fin cor assire ,
Totz autres pes gieta defors e lansa ;
Pero selieis qu' a sos ops m' a conques
Tanh qu' a mos precx s' adouz sos cors prezans ,

Tro sia 'l cors ab los huelhs acordans
Que paresca qu' al coratge plagues.

Mi dons sap far de joy semblar pezansa,
E son voler celar et escondire,
Puois fai semblans cortes ab son dous rire,
Per qu' ieu no sai cor jutgar per semblansa;
Mas, si be m vol, en breu temps paregues,
Pus li sui fis, leyals, ses totz enjans,
Qu' ieu no pens d' als mas de far totz sos mans,
Que m dones cor, qu' ilh a lo mieu conques.

E pois no m part de sa bon' esperansa,
Vas mon dezir adouz son cor e vire,
Que cors non pot pensar ni boca dire
L' amor que ill teing ni la fina amistansa;
E pois mon cor li teing aissi 'n defes,
Que non i lais intrar autres talans,
Sia de mi sovinens, e membrans
Que mil maltratz en mi plaideia us bes.

E sol qu' el cor aya de mi membransa,
Del plus serai atendens e sufrire,
Ab que l' esguar se baizon e ill sospire
Per qu' el dezirs amoros no s' estansa;
Qu' ab sol aiso ai tot quan mestier m' es,
E serai li plazens e merceyans,
Quar aiso es vida dels fins amans,
Qu' amors non viu mas de gaug e de bes.

Ja lauzengier no l'en fasson duptansa,
Qu'ieu n'ai vas els pres engienh et albire,
Qu'ieu bais los huelhs, et ab lo cor remire,
Et en aissi cel lur ma benenansa,
Que nulhs no sap de mon cor vas ont es,
Ans qui m'enquier de cui se fenh mos chans,
Als plus privatx estau quetz e celans,
Mas que lor fenh de so que vers non es.

Glorieta, entre vos e merces
M'achaptas joy de lieis cui sui amans,
E digas li qu'ab s'amistat m'enans,
Qu'ie 'l port el cor amor e bona fes.